



Ang Kalihukan

National Democratic Front - Amihanang Sentral Mindanao
Tuig 30 | Gula 1 | Ispesyal nga Isyu | Oktubre 5, 2023



EDITORIAL

Papanubagon si Marcos Jr. ug ang AFP sa ilang nagtipun-og nga krimen sa gubat batok sa mga babaye ug bata!

Mas isog na karon ang 4th Infantry Division, Philippine Army ilalom ni Gen. Jose Ma. Cuerpo II. Dili batok sa langyaw'ng mga nasud nga gapangilog sa Pilipinas aron depensahan ang kaugalingnan. Kundili, mas isog ug daw irong buang kini nga nagapangatake sa mga walay ikasukol nga mga babayeng buros, masakiton ug edaran ug sa mga inosenteng bata. Gikan sa rehimen ni Rodrigo Duterte hangtud sa kasamtangan ni Ferdinand Marcos Jr., natala sa North Central Mindanao Region ang 13 ka kaso sa mga buros nga gidagit ug ilegal nga gidakop, kung asa siyam niini nahitabo ilalom kang Marcos Jr.

Sa tumang desperasyon nga "bungkagon" kunuhay ang rebolusyonaryong kalihukan sa rehiyon, dayagang ginalapas sa rehimen US-Marcos Jr., duyog ang iyang mga berdugong gaway nga Armed Forces of the Philippines (AFP) ug Philippine National Police, ang internasyunal nga makitawhanong balaod ug ginatarget nag-una ang mga *hors de combat* ug bisan ang mga inosenteng sibilyan ug puya nga bata.

Sa kasagarang kaso, ginadagit sa mga militar ang

mga biktima sa ilang gipondohang lugar, dal-on sa usa ka "safehouse" ug ginapailalom sila sa grabeng interogasyon. Sikreto ang tipo sa pagdakop kung asa, dili susama sa kasagarang kaso nga ginaparada dayon nga "surenderi" o ginakuhaan og *mugshot*, dili ginapubliko sa AFP ang dinakpan. Bisan kung hawid na sa militar ang gidagit, ginatugutan gihapon ang biktima nga dili moputol og linya sa iyang mga kauban ug pamilya aron

mogawas nga daw anaa lamang siya sa maayong kahimtang.

Gidugangan pa sa AFP ang ilang grabe na ka hugaw nga rekord sa pagkamaluibon sa gubat. Ang mga kaso sa mga buros nga Pulang manggugubat mao ang bangis nga pagsulay sa pasistang AFP nga himuon silang hostage aron ipresyur ang bana nga naa sa hukbo. Susama usab ang gihimo bisan sa edaran nga mga inahan sa mga Pulang manggugubat nga ginapatay ug ginadakop aron ipahuyang ang ilang mga anak nga aktibong nagalihok sa rebolusyonaryong kalihukan.

Mas ngil-ad pa, kinauyukan sa maong hugaw nga taktika sa AFP mao ang pugos nga paghatag og "tahas" ug pugos nga makahimo og salaod ang mga kaubang ilang nadagit ngadto sa rebolusyonaryong kalihukan. Taliwala sa kabilinggan sa panglawas ug bisan kamulo pa nga nagsabak, ginapailalom sa mga militar sa grabeng mental nga tortyur ang mga buros ug masakiton ug ginahulga nga dunay dili maayong mahitabo sa ilang anak ug mga kapamilya kung dili motuman sa "tahas". Kasagaran sa maong "tahas" mao ang pagkumbinse sa bana nga mopahulay, pagkawat og pusil gikan sa organisasyon, pagpatay og kauban ug makanunayong paghatag og datos pinaagi sa selpon. Aron siguradong matuman kini, gina-hostage sa AFP ang anak sa kauban sama na lamang sa pagkuha sa anak ni Cherilyn Rebita nga si Baby Rhea ayha siya gibuhian aron tumanon ang "tahas".

Sa mga kaso sa nadetine nga buros o bag-ong panganak nga mga kauban, grabe ka sayo sila nga nabulag sa ilang puya nga anak. Pugos silang gibulag sa nagsuso pa unta nga anak. Gibalewala ang ilang paghangyo ug pagduso sa ilang ispesyal nga katungod isip inahan. Tungod niini, napihig ang mga bata sa saktong nutrisyon ug himsog nga panglawas ug nahimo silang bulnerable sa pagkasakit ngadto sa sayong pagkamatay. Sa kaso ni Lorena Micabalo, namatay ang iyang walo ka bulan nga anak human nga iligal siyang giaresto sadihang usa ka bulan pa lang si Baby Xia.

Nakalatid sa Protocol 1 ug 2 sa Geneva Conventions ang mga batakang katungod sa buros nga babaye, sa mga bata ug sa mga masakiton. Ilalom niini, adunay ispesyal nga katungod ug pagrespeto nga angay ihatag ngadto sa mga kababayan-an ug bata tungod sa pag-ila kanila isip mga "protektadong tawo" panahon sa gubat. Obligasyon sa kinsamang tampi nga ihatag ngadto sa bata ang pag-atiman ug pagtambal nga iyang gikinahanglan. Haom kini nga balaod taliwala sa kung unsaman ang ilang istatus, armado man o dili.

Ginagarantiya usab ilalom sa Comprehensive Agreement on the Respect for Human Rights and International Humanitarian Law (CARHRIHL), nga gipirmahan tali sa Gobyerno sa Republika sa Pilipinas ug sa National Democratic Front of the Philippines, ang pagrespeto sa internasyunal nga makitawhanong balaod. Ilalom sa probisyon niini, tin-aw nga gilatudin nga ang mga *hors de combat* "...angay respetuhon alang sa ilang kinabuhi, dignidad, tawhanong katungod, pulitikanhong pagtuo ug ilang moral ug pisikal nga integridad ug angay nga panalipdan sa bisan unsamang sirkumstansya ug tawhanon silang itratar..." Ang mga Pulang manggugubat nga babayeng buntis otomatikong malakip sa mga *hors de combat* tungod kay wala silay katakus sa pagsukol.

Apan garapalan ang reaksyunaryong estado sa paglapas sa unsamang nakalatid nga balaod. Sa kapin usa ka tuig pa lang nga paglingkod ni Marcos Jr. sa poder, tin-aw niyang ginapakita nga siya kontra-babaye, kontra-bata ug kontra-katawhan. Sama sa nilabay'ng mga rehimen, matitud-anon niining gipadayon ang maduguong kasaysayan sa pasismo ug kamaluibon. Ang maong mga kaso batok sa mga bata ug kababayan-an kabahin lamang sa daghan pang kaso sa kalapasan ni Marcos Jr. ug sa 4th ID sa tawhanong katungod ug internasyunal nga makitawhanong balaod.

Makatarunganon lamang tugbangan og labaw pang kaisog sa katawhan ang kabangis sa nagtunhay nga estado. Angayang padayong mobarog ang mga biktima ug mga pamilya nila aron mapapanubag ang mga nagpaluyo sa

ngilngig nga mga krimen sa gubat. Kadungan niini, kinahanglang mapakaylap ug matun-an sa mga masa ang internasyunal nga makitawhanong balaod tungod kay mao kini ang nagapanalipod sa ilang mga katungod nga kanunay'ng ginalapas sa mga elemento sa estado.

Kahanas ni Marcos Jr. ang pagtabon sa tinuod nga sa kasaysayan. Angay niyang hinumduman nga sadihang gipahamtang sa iyang amahan nga si Ferdinand Marcos Sr. ang balaod militar niadtong 1972 ug nidagsang ang grabeng paglapas sa tawhanong katungod, nikusog ang rebolusyonaryong pakigbisog sa tibuok nasud. Kini nga mga kaso labaw lang nagasugnod sa daan nang kasilag sa katawhan sa himalatyong sistemang semikolonyal ug semipyudal ug magtukmod pa nila sa labaw pang panaghiusa ug pagsukol. Makasaysayanon kining dili mapugngan ug gikinahanglan.

Sa samang higayon, kinahanglang labaw pang ipaasdang sa Bagong Hukbong Bayan ang rebolusyonaryong armadong pakigbisog. Ang BHB ang magsilbi nga pinakalig-ong kota sa kabanikanhan nga nag-unang mopakyas sa

gipagrabeng pasismo sa estado. Ang BHB ang magsilbing dangpanan sa lapad nga masa sa katawhan nga adlaw-adlaw'ng ginabiktima sa pagpatay, pagtortur, pagdakop, pagpanghulga ug pagpamomba. Kinahanglang maglunsad ang BHB og mga aksyon batok sa mga elemento sa reaksyunaryong estado nga nagapasiugda sa kalapasan sa mga baryong iyang ginalihukan.

Kadungan niini, kinahanglang makanunayong konsolidahon sa tanang Pulang manggugubat, ilabina sa mga inahang rebolusyonaryo, ang iyang determinasyon ug rebolusyonaryong moralidad tungod kay mao kini ang iyang nag-unang hinagiban atubangan sa grabeng mga sakripisyo ug pagsulay. Wala nay lain pang mas gamhanan kaysa sa atong pagbarog sa atong pulitikanhong pagtuo ug pagbutyag sa kabangis sa kaaway. Kini ang pinakalig-ong armas nga dili kanus-aman mailog o mabayran sa kaaway. Gamiton kini nga armas aron labaw pang iasdang ang rebolusyon hangtud sa kadaugan. Ang demokratikong rebolusyon sa katawhan lamang ang bugtong dalan nga mohatag og proteksyon ug garantiya sa kaugmaon sa mga bata ug sunod pang mga henerasyon.

Mga Insidente

Naa sa mosunod ang pipila lamang ka kaso sa mga pagpangdagit, iligal nga pagdakop ug pagpatay kung asa biktima ang mga babayeng buros, masakiton ug edaran ug mga bata. Kasagaran niini nga mga kaso wala pa nahatagan og hustisya ug kasagaran sa mga biktima nagpabilin pa sa bilangguan. Aduna pay mga kaso nga wala pa nataho ug natala.

Pagdagit sa upat ka buros ug usa ka samaron ug pag-hostage kang Baby Rhea

Pito ka bulan ang tiyan ni Cherilyn Rebita (Ka Jan) ug ni Roselle Polinar samtang samaron si Jackilyn Egtob (Ka Jane) sa dihang gidagit sila sa mga elemento sa 402nd Infantry Brigade sa Surigao del Norte niadtong Agosto 26, 2022. Naila ang mga ahente sa militar nga silang Armando Rabanes (Antoy/Dagat), nga usa ka surenderi ug traydor, JB Bautista, Jeffry Muñoz ug nagpailang "Ondoy".

Gidala dayon sila sa usa ka "safehouse" sa Ata-atahon, Nasipit, Agusan del Norte ug didto gipailalom sa grabeng interrogasyon. Halos adlaw-adlaw silang gina-usisa sa pabalik-balik nga mga pangutana kabahin sa mga kauban, sa nagplatar sa ila sa paggawas ug sa nahimutangan sa ilang yunit. Samtang naa dinhi, walay kahibalo ang ilang mga pamilya nga nadakpan na sila tungod kay gihilom lamang sa militar ang pagdagit kanila. Sa samang higayon, ginatugutan sila nga mag-kontak sa ilang mga pamilya ug kauban aron maghuna-huna lamang kini nga anaa sila sa maayong kahimtang.

Ginapailalom usab sila sa mental nga tortyur, taliwala sa pagmabdos, sama na lamang sa pagbahad sa mga ahente sa militar kang Polinar aron mokoopereyt. Padayong ginapakontak sa selpon si Polinar sa mga kaubang hukbo aron padayon kuno kining mosalig sa iya. Gina-oryentahan usab si Rebita ug Egtob sa mamahimo nilang "tahas" kung mobalik sila sa hukbo.

Niadlong Oktubre 10, 11:45 sa gabii, gipanganak ni Rebita si Baby Rhea sa San Vicente Birthing Clinic ug gibalik ra sab dayon sa "safehouse" pagka-Oktubre 12. Niining adlaw, nanganak usab si Polinar.

Niadlong Oktubre 28, nanawag ang mga kaubang hukbo kang Polinar ug namalihog nga ipaatiman ang duha ka buros nga kauban nga silang Aurilyn Havana (Ka Laile) ug Jennifer Binungkasan (Ka Layza). Dili unta kini dawaton ni Polinar apan kanunay siyang ginahulga ni Bautista ug Rabanes nga dawaton kini aron kuno dili mamatikdan sa kauban nga nadakpan sila. Dungan usab niini, kanunay nang ginabaharan ang ilang kinabuhi.

Niadlong Nobyembre 2, gikuha si Baby Rhea gikan kang Rebita sa nagpailang "Jonathan", usa sa mga ahente sa militar.

Pagka-Nobyembre 3, nagbyahe na si Rebita ug Egtob pabalik sa yunit sa NPA. Kini usab nga adlaw nakatakang sunduon silang Havana ug Binungkasan. Samtang nagbyahe, adunay naka-iskort kanila nga mga sundalo. Pag-abot sa mga gisundo, sa haywey sa Brgy. Libertad, Butuan City, Agusan del Norte, nagpahipli dayon ang mga sundalo. Ang gisakyan nilang Rebita nga motor sa kaaway mao ra usab dayon ang gisakyan sa mga kaubang buros.

Kaniadtong Enero 5, 2023, tungod sa grabeng presyur alang sa pagpagula kang Binungkasan, Havana ug Polinar, pugos nga gipagawas sa 402nd IBde ang ilang mga dinagit. Gipagawas dayon nila kini nga kuno nga "surenderi". Sa kasamtangan, anaa pa gihapon sila sa kamot sa kasundaluhan.

Kadaugan sa pag-uli ni Baby Rhea sa iyang pamilya

Niadlong Disyembre 28, 2022, maisugong nagpagula og bidyo silang Rebita ug Egtob, ug si Ka Logan (bana ni Rebita) ug Ka Web (bana ni Binungkasan) aron ipanawagan ang pag-uli kang Baby Rhea sa pamilya ug pagpagula kang Binungkasan, Havana ug Polinar. Maisugong gibutyag ni Rebita ug Egtob ang gihimong pagdagit kanila sa mga sakop sa 402nd IBde.

Pagka-hapon dayon sa maong adlaw, naay nitawag sa iyaan ni Baby Rhea nga kuno "makigkita".

Pagka-Disyembre 29, alas-5:00 sa hapon, giadtoan sa mga pamilya, kuyog ang mga iyaan, uyuan ug mga ig-agaw, ni Baby Rhea ang gisabutang haywey kung asa sila magkita. Nakuha nila si Baby Rhea gikan sa usa ka wala nagpaila nga babaye.

Apan wala dinhi nahuman ang kalbaryo nilang Baby Rhea. Kanunay gihapong ginaadtoan ang balay ni Imee Villa, iyaan ni Baby Rhea, sa mga ahente sa militar ug kanunay silang ginabaharan.

Kaniadtong Pebrero 17, 2023, gipusil-patay sa mga elemento sa AFP si Erwin Meliton, bana ni Villa, sa ilang umahan. Nagresulta kini sa pagbakwit sa pamilya ni Baby Rhea tungod sa grabeng kahadlok.

Hangtud sa kasamtangan, dala ni Baby Rhea ug sa iyang pamilya ang grabeng trauma tungod sa bangis nga pagpangatake sa mga ahente sa kaaway kanila.

Pagkamatay ni Baby Xia ug iligal nga pagdakop ug detensyon kang Micabalo

Usa ka bulan pa lamang si Baby Xia sadihang iligal silang gidakop kuyog iyang inahan nga si Lorena Micabalo niadtong Pebrero 14, 2019 sa Mabini, Davao del Norte sa mga elemento sa 1st Special Forces Battalion, ilalom sa 403rd IBde, ug gidala siya sa hedkwarters niini sa Brgy. Mampayag, Manolo Fortich, Bukidnon.

Dugay pa nga giturn-over si Micabalo sa prisohan tungod kay gusto pa siyang ipabali sa mga militar apan wala sila naglampos. Paghuman sa kapin kon kulang duha ka bulan, gibalhin si Micabalo sa Provincial Detention and Rehabilitation Center sa Malaybalay City, ug nabulag na sila ni Baby Xia. Taliwala sa pag-apela ni Micabalo nga iyang kuyugon si Baby Xia sulod sa prisohan tungod kay ginapasuso pa niya kini, wala kini gitugutan.

Sadhang nakuha na si Baby Xia sa iyang pamilya, luya kini ug kanunay'ng gasakit. Niadtong Setyembre 19, 2019, na-diagnose si Baby Xia sa sakit nga sepsis tungod sa malnutrisyon niini. Mao kini ang nahimong hinungdan sa iyang grabe ka linghod nga kamatayon. Wala gitugutan si Micabalo sa korte nga motambong sa haya ug lubong ni Baby Xia.

Hangtud sa kasamtangan, nakigbisog pa gihapon si Micabalo nga mabasura ang mga tinumu-tumong kaso nga gipasaka kaniya. Niadtong Agosto 2023, wala usab siya gitugutan nga motambong sa haya ug lubong sa iyang amahan nga si Dionesio Micabalo.

Iligal nga pagdakop ug detensyon kang Romanya ug Jabagat

Si Ofelia Romanya, 40 anyos, tulo ka bulan nga mabdos sa iyang ika-upat nga anak sadihang gidakop sa mga elemento sa 23rd Infantry Brigade, PA ilalom sa 402nd IBde niadtong Mayo 16, 2020 sa Buenavista, Agusan del Norte. Human sa pagdakop kaniya, gidala siya sa Jamboree, Brgy. Alubijid, Buenavista kung asa nahimutang ang hedkwarters sa 23rd IB. Samtang naa sa kostudiya sa kaaway, gipailalom siya sa grabeng presyur. Pugos siyang gipapirma og waiver nga "uyon siya nga magpakostudiya sa 23rd IB."

Gunit gihapon si Romanya sa 23rd IB hangtud sa iyang pagpanganak niadtong Nobyembre 2020. Gani, gibalik pa gihapon siya sa hedkwarters niini human siya nanganak.

Niadtong Nobyembre 2022, gibalhin si Romanya sa prisohan sa Brgy. Lumbia, Cagayan de Oro City. Gilambigit si Romanya sa mga tinumu-tumong kaso. Ayha pa nakuha sa mga paryente ang bata ni Romanya sadihang nabalhin na siya sa prisohan.

Walo ka bulan usab nga buros si Marice Jabagat sadihang gi-reyd sa mga elemento sa 58th Infantry Battalion, ilalom gihapon sa 402nd IBde, ang balay nga temporaryo niyang gipondohan niadtong Disyembre 21, 2020 sa Salay, Misamis Oriental. Gitamnan siya sa mga militar og granada nga mao kuno ang "evidensya" batok kaniya. Gibalhog gilayon si Jabagat sa Misamis Oriental Provincial Jail sa Cagayan de

Oro City kung asa giatubang niya ang tinumu-tumong kaso nga gipasaka kaniya.

Niadtong Enero 22, 2021, gipanganak ni Jabagat ang iyang ikaduhang anak nga si Baby Ubie. Hangtud karon, nakigbisog pa si Jabagat sa kasong gipasaka kaniya.

Pagkadakop kang Coleta, Baby Mark ug Baby Jem

Usa ka tuig pa lamang si Baby Mark sadihang gidakop sila kuyog iyang inahan nga si Marivic Coleta, 22 anyos, laing tulo ka lider-mag-uuma, usa ka menor-de-edad ug usa ka 2-anyos nga bata nga si Baby Jem niadtong Enero 30, 2019 sa Villa, Misamis Oriental.

Gipasakaan si Coleta og kasong "illegal possession of firearms and explosives" nga gikan sa gitanom nga pusil, bomba ug granada sa pagdakop kanila sa mga elemento sa CIDG, SWAT, sundalo ug pulis.

Sa pagdakop kanila, gibutang dayon si Baby Mark, Baby Jem ug ang usa ka menor-de-edad sa kustodiya sa opisina sa Department of Social Work and Development (DSWD) sa rehiyon. Nanghingusog ang mga pamilya nilang Baby Mark nga makuha silang tulo apan dugay kini nga gihatag sa DSWD. Nagkampuhan ang mga pamilya sa gawas mismo sa opisina ug gipagawas ang duha ka bata human sa usa ka semana. Duha ka semana pa ayha gipagawas ang menor-de-edad.

Hangtud sa kasamtangan, ginapakigbisogan ni Coleta ang ginaatubang nga kaso.

Pagpatay kang Nanay Elisita

Gipatay si Elisita Oba Compas, 60 anyos kapin, sa mga elemento sa 58th Infantry Battalion, PA, sa iya mismong balay sa Sityo Bangbang, Brgy. San Vicente, Medina, Misamis Oriental niadtong Disyembre 22, 2021. Naila ang mga nagpatay nga silang Jimboy Almonte Acosta ug Efren Takin. Gipusil-patay si Compas gamit ang mugbo nga kalibre sa armas

Motibo sa pagpatay kang Compas tungod kuno kay "naa siyay anak nga NPA." Napa-*blotter* na sa pulis ang maong kaso apan wala pay aksyon hangtud sa kasamtangan.

Serye sa iligal nga pagdakop kang Wikay ug Nanay Erlinda

Says anyos si Nelkyza "Wikay" Lindaan samtang 61 anyos ang iyang lola nga si Erlinda Manseguihao sa dihang iligal silang gidakop sa mga dili-armadong naka-*face mask* niadtong Setyembre 2019 sa ilang gipuy-an nga balay sa Malaybalay City. Walay dala nga bisan unsang mandamyento ang mga nagdakop.

Gidala sila sa gamay nga tindahan gawas sa Provincial Detention and Rehabilitation Center (PDRC) sa Bukidnon ug didto sila giimbestigahan. Nailhan ni Manseguihao ang usa sa mga nagkuyog sa nagdakop nga si Glyceria Balangiao, surenderi ug traydor nga asset sa militar. Gibuhian ra dayon silang Manseguihao ug Wikay sa maong adlaw sa tabang sa usa ka pari. Ayha gipapauli, gibaharan si Manseguihao nga kuno kung madakpan siya sunod, "naa na siyay warrant."

Kaniadtong Setyembre 4, 2021, laing kalbaryo na usab ang nasagubang nilang Wikay ug Manseguihao. Iligal na usab silang gidakop kuyog ang lain pang upat sa Sityo Dimagalen, Brgy. Karim, Buldon, Maguindanao. Matud pa sa kapulisan, ilang gidakop si Manseguihao tungod kay "naa kini mga anak nga membro sa NPA."

Sa pagdakop, gitanom kanila ang duha ka .45 kalibreng pusil ug mga *magazine* niini. Gilangkuban ang nagdakop sa mga elemento sa pulis, sundalo ug Marine Battalion Landing Team 2 ug 5, pulos ilalom sa 6th Infantry Division. Gidala dayon silang Manseguiario sa police station sa Buldon ug gibalhin sa sunod nga mga adlaw sa provincial jail sa Cotabato. Gipasakaan gilayon sila og kaso kuno sa Anti-Terror Law.

Sa samang higayon, gibutang si Wikay sa PNP Buldon ug giturn-over dayon sa Maguindanao-Social Work and Development. Naghangyo pa si Manseguiario nga ihatag ang kontak sa selpon sa iyang mga paryente aron makuha si Wikay apan wala kini gihatag sa militar ngadto sa mga social worker. Giadtoan na sa mga paryente si Wikay apan dugay pa siya gipagawas bisan kung naa silay gipakita nga kopya sa iyang birth certificate. Usa ka semana pa ayha nakuha si Wikay sa iyang pamilya.

Kaniadtong Hunyo 2, 2023, gibalhin si Manseguiario sa Dapicol Penal Colony sa Davao City. Convicted kini sa tinumu-tumong kasong "*accessory of financing terrorism*" ug nakatak dang mapriso sulod sa 12 ka tuig.

Iligal nga pagdakop sa masakiton nga si Domino

Adunay myoma sa matress si Julieta Galario Domino, 52 anyos, sadihang iligal siya nga gidakop sa mga elemento sa 402nd Infantry Brigade ug PNP 13 sa iyang gipuy-an sa Sitio Maitum, Brgy. Langkilaan, Trento, Agusan del Sur.

Gipasakaan si Domino og mga tinumu-tumong kaso nga "*frustrated murder*" ug "*attempted murder*".

Iligal nga pagdakop kang Nanay Arkelina ug Analyn

Iligal nga giaresto si Arkelina Ayuma, 60 anyos, niadtong Agosto 2022 sa iya mismong balay sa Brgy. Pambugas, Claveria, Misamis Oriental sa mga elemento sa 58th Infantry Battalion. Human kini nga gi-claim ni Ayuma ang patay'ng lawas sa iyang pag-umangkon nga Pulang manggugubat nga napatay sa engkwentro tali sa AFP. Gibalhog siya sulod sa duha ka bulan.

Susamang insidente usab ang nahitabo sa magtiayong Arkelina ug Elve Hendina, parehong kapin 50 anyos. Gidakop sila niadtong Nobyembre 19, 2022 sa mga elemento sa 58th IB sa Brgy. Rosario, Balingasag, Misamis Oriental tungod usab sa pag-claim sa napatay nga igsoon ni Elve nga Pulang manggugubat. Giimbestigahan sila tungod kuno kay aduna silay uban pang mga igsoon nga aktibo sa rebolusyonaryong kalihukan. Gibuhian sila sa sunod nga adlaw.

Pag-hostage kang Baby Reboy

Duha ka bulan pa lang si Baby Reboy sadihang pugos siyang gidala ni Allan Morata (Pang), surenderi ug traydor nga asset sa militar, sa kampo sa 23rd Infantry Brigade sa Buenavista, Agusan del Norte niadtong Hunyo 2021. Si Baby Reboy natawo niadtong Marso 23, 2021 ug ang iyang mga ginikanan aktibong mga Pulang manggugubat.

Human niini, gikuha ni Kim (Patrick) si Baby Reboy. Tumong kuno ni "Patrick" nga ipresyur ang mga ginikanan ni Baby Reboy aron mosurender.

Hangtud sa kasamtangan, naka-hostage pa gihapon si Baby Reboy sa mga ahente sa militar.